

## Wirksamer Rosenkranz

Der Geistlich Rot Hans Heberlein  
löffft vill durch sei Pfarrei,  
spaziert oft stundenlong do draus  
der Untern Gärtneri.

Om liebsten wor er ganz allaans,  
hot geschaut und nochgedocht,  
wos er om Sunntog in der Kerng  
zu seine Holzköpf socht.

Er schlendert eines Nachmittogs  
am Friedhof draus entlong,  
om Gundelshammer Wegla draus,  
do hetts na bald erschlong:

"Grüß Gott! Hochwürdn! So a Glück!"  
än Pfarrer schütteltes fast:  
Die giftigst Schlanga vo der Pfarr,  
die hot na obgepaßt!

Scho trappt sa eilig nebenher -  
do nutzt ka schneller Schritt!  
Sunst spielt sa's ganz Johr Freggerles -  
jetzt helt sa eisern mit!

"Ich hob ka richtiga Ondocht mehr!  
Hochwürden! Mich mechts kronk!  
Des Ärgernis kniet alla Toch  
vorn in der örschtn Bonk!

Mei Nachbera, die tut so fromm  
und is a ganz schlechts Trumm!  
Die mecht - sie glaams vielleicht gor net? -  
i c h waß! - mit Menner rum!

Sie werrn mer recht geh, wenn ich etz  
die Wöhrheit ganz erzehl:  
"A weng Gerechtigkeit wenns gibt,  
dann muß die nei die Höll!"

"Mei Guta!" secht der Geistlich Rot  
"do dörf mer net long redn!  
Wenn mir die Seel nuch rettn wolln,  
dann hilft ner bloß äs Betn!"

"Do is ja", secht er, "Gotteswilln!  
scho höchsta Eisenboh!"  
Ziecht ausn Rock an Rosnkronz,  
fengt laut äs betn o.

Fünf Gsetzer hom sa durchgemacht.  
Manch Gärtner streckt sein Krong:  
Die machn scheints, er hörts bewegt,  
an extra Flurumgong?

Sie sänn scho bald in Bruckertshof,  
wies endlich "Amen" haßt.  
Die Fra vergeht vor Ungeduld  
mit ihra innern Last:

"Hochwürden! Zeug secht die zä mir!  
Lusch, Dreegsau, Ratschn, Gons!!...  
"Do braung mer", secht der Geistlich Rot  
"gleich nuch an Rosnkronz!"

"Im Nam' des Vaters" fengt er o  
und zögert ka Sekund.  
Er bet't laut vor, sie folgsam mit  
die nächsta halba Stund.

Der Pfarrer, wie sa fertig worm,  
der fellt ra schnell neis Wort:  
"No?" fregt er "hom Sie nuch a wos?  
Wenns sei muß, fohrn mer fort!"

"Na! ... Ich net! ... Bloß, mich reut der Mo!  
Wos d e r zä leidn hot!"  
"no also! Bet mer a für ihn!  
Des schaff mer bis zur Stodt!"

Und bei dem drittn Rosenkronz,  
do is a Wunder gscheng!  
Die Fra schleicht nei an Seitnweg  
auf Nimmerwiedersäng!

Der Geistlich Rot geht fröhlich ham  
und secht: " Es gibt kann Zweifl!  
A Rosenkronz reißt Himmel auf  
und jogt zägor an T e i f l !!"